

編號 1 號

【爛布子歲月】李宜諭原作

六月个南臺灣，莊下个圳溝脣、人家屋前屋背，總會看著青青黃黃、細細粒仔、打到歸樹杷¹个爛布子。又到剝爛布子樹杷、擇爛布子、搨²爛布子个時節也，該係吾記憶裡背个好味緒。

頭擺，阿婆在楊寮下田坵脣俛圳溝个所在，種有三頭爛布子樹。逐年五六月仔，爛布子好摘也，寮日打早，阿爸就會用奧多拜載等僱兜恁多姊妹，奧多拜个後架仔再拖一臺里阿卡³，去楊寮下斫爛布子。去到楊寮下，遠遠就看著阿公背等大鏟仔在該剝樹杷也，一枝一枝當大枝个樹杷剝下來，阿爸就同大樹杷拖擎共下，再同掛等爛布子个部分，一細杷一細杷仔剝下來，僱兜細孬仔就搵手同爛布子樹杷拖到布袋仔裡背。包尾，阿爸會同一布袋一布袋个爛布子，上到里阿卡項拉轉屋下。

轉到屋下，阿姆既經擎一隻大腳盆放在天井該也。爛布子倒到腳盆項再舀滄水，大家就圍等腳盆，坐在矮楯頭項，開始擇爛布子。因為剝忒蒂頭个爛布子會有液液个乳，故所，愛同兩隻手浸在水裡背，一粒一粒仔擇。擇好个爛布子放在細盆仔裡背，無

愛个梗就擲在大腳盆脣。兩隻手浸在水項久也，手指就會皺皮皺皮，像老人家个手樣仔，有息把得人驚。

因為愛一細杷一細杷緊搨、緊尋、緊擇，下把仔會昏哆昏哆⁴，毋知頭⁵同梗擲在細盆仔裡背，爛布子嘎攞到盆仔外背，分醒也又正煞煞同擇好个爛布子拈轉細盆仔項，正式係加無閒个。

滄滄一脚盆个爛布子差毋多愛擇論⁶點鐘。阿婆會同擇好个爛布子倒到大鑊頭裡背，架樵燒火，還不時愛去攏一下佢，正毋會結爇。爛布子爇熟也，趕燒燒就愛舀到碗項攤鹽去搨，鹽較多一息較遠結砣。就恁仔燒手燒腳⁷無閒一日，一坵一坵个爛布子餅總算做好也。

爛布子加蒜頭煎到赤赤一等好食，下擺仔攤雞卵去煎又還較香，係細人仔个最愛。吾爸為著愛拐僱兜細人仔食飯，就教僱兜一細砣爛布子傍一大口飯，飯吞下去也，再用大門牙嚙等爛布子仁，過用舌嫌西啊出⁸，看麼人个爛布子仁射最遠，故所，逐餐食飯都緊搞緊食、嘻嘻哈哈。

該段擇爛布子、西爛布子仁个日仔，乜係僱永遠記在心个幸福歲月。

¹ 樹杷：音 su pa`；樹木的枝條。

² 搨：音 kied；用手攪拌、擠壓。

³ 里阿卡：音 li` a ka`；外來語，兩輪拖車，可以人力拉動或連結於車輛後方。

⁴ 昏哆昏哆：音 fun` de` fun` de`；非天生因素造成的頭昏腦脹。

⁵ 毋知頭：音 m` di` teu`；糊塗、心裡不明白。

⁶ 論：音 nun；推知。

⁷ 燒手燒腳：音 seu` su` lug giog`；比喻操作燙手的工作。

⁸ 西啊出：音 te` a cud`；吐舌或用舌頭將口中之物剔出。

115 年全國語文競賽臺灣客語朗讀文章高中學生組（四縣腔）

編號 2 號

【該下】林伯殷原作

「投手擲出球」、「打擊者用力一晃，球飛向一壘！」、「哦！一壘手跔啊下接殺，黏時用腳踩轉壘包，一壘跑者赴毋掣走轉一壘，再見雙殺！」「臺灣贏咧！臺灣贏咧！臺灣得著世界棒球十二強比賽冠軍！臺灣冠軍！臺灣冠軍！……」電視主播喊到聲會失忒吔。該下，球場裡肚个臺灣選手感動到噉吔、教練噉吔、現場同電視面前个球迷也噉吔。該下，臺灣人非常感動，也當沙鼻，因為，這群選手實現吔臺灣人打野球个百年夢想，完成咧臺灣人當望，毋過毋識望著个心願。

日頭下，一群晒到烏刻刻个球員在球場練球，聽等教練个指導同示範，認真學習各種基本動作。練了一擺又一擺，就算汗流脈落，衫褲溼吔又燥、燥吔又溼，也無停跔一下。恁樣煞猛練習，就係為著在比賽个時節做得有好个表現、好个成績。臺灣從少棒到成棒，各地各級个選手都係一路打拚上來个真材實料。好得恁多年來，臺灣打野球个環境有改善吔，培養出恁多有名个球員，正有好點出恁多个人才，組成恁勻線个球隊來代表臺灣出戰。故所，係因為有大家个長期投入，正有打贏比賽該下个歡

喜、感動同日汁。

除忒長期个努力，也愛有當多頭擺个該下，正會有包尾光榮个該下。像：嘉義農林野球隊得到甲子園亞軍、紅葉少棒隊、三級棒球隊去美國比賽得冠軍、臺灣職業棒球開始、臺灣球員加入大聯盟比賽等等。這一擺又一擺个該下，分大家一擺又一擺來關心棒球比賽，這種熱情一直在恁俚个心肝肚，毋識烏忒，臺灣个棒球歷史正有機會寫到拿十二強冠軍該下。當然，該下還吉結束，因為，棒球比賽還係會繼續參加下去，相信還有當多感動人个該下會接等下去。

臺灣人有好沙鼻、有好分人阿腦該下，表示大家識打拚過咧，像：棒球、羽毛球、晶片製造、全民健保這兜，就係大家打拚个結果；反轉來講，大家有打拚，臺灣人正有好沙鼻、分人阿腦該下。

編號 3 號

【貓仔鬧鐘】徐姿華原作

因為驚會睡過邊，佢從細就有設鬧鐘仔个習慣，讀書時節係用鬧鐘仔，這下會用手機仔。愛睡目進前先定好時間，時間一到，鬧鐘仔个音樂就會響起，同宕睡个佢對甜甜个夢肚喊醒、對燒暖个被骨竇拉出來。分鬧鐘仔吵醒雖然當毋甘願，也總比赴毋著上課、上班，分先生、頭家刻臭頭較贏。

這恁久，佢又多一個鬧鐘仔。這鬧鐘仔當生趣，有幾下種方式喊人跣床，分這鬧鐘仔喊醒，吾心肝肚毋單淨毋會慍悴，還會目笑鼻笑，歡喜甘願个跳落眠床，還會有歸日仔个好心情呢！係麼个樣仔个鬧鐘仔恁好用？哪位有好買啊？這鬧鐘仔孤門獨市、無哪好買，單淨為佢服務定定，這就係吾个貓仔鬧鐘——咪咪。

平常時，手機个鬧鐘仔響，佢若係還繼續勒床¹，佢就會喵喵滾緊喊佢，無就用厥該粗鱗鱗个舌嫵舐吾手，提醒佢「好跣咧」；佢也會同厥細細粒个頭那鑽入吾个手巴掌肚，使妮个討愛人掌厥頭那。恁得人惜个動作，麼人還睡得落覺？佢黏時就跋跣來，認真同佢掌頭那、掌圓身，掌到時間及及地正停手。

¹ 勒床：音 ngiun congˋ；賴床。

有一日朝晨，跣床个時間到地吾手機仔嘎無響，佢還睡到屎肫孔孔。迷迷痴痴時試著有麼个在該揪吾褲，目睡摸些嘎看著咪咪用牙齒輕輕仔嚙等吾褲揪一下、揪一下，放忒一下又過來嚙。佢當細義無嚙著吾腳髒，毋過，也同佢喊醒咧。好得佢，該日上班正無慢到。

還有一擺，拜六毋使上班，佢挑挑無設鬧鐘仔，發夢當在該食大餐，結果，肚屎、胸脯嘎分人擱核，感覺重重、痛痛，目珠一擘啊開，同咪咪四目相對，五公斤个佢企在吾肚屎面，犁頭看佢，當像在問講：「人，你毋使上班喲²？還毋遽遽跣床？」哀哉——這貓仔鬧鐘實在還生趣哪！等佢跣床地，佢就會坐等看佢出出入入、無閒準備上班。等佢愛出門咧，佢正尾翹高高行過來，在吾腳脣徑兩下、喵兩聲，親像係同佢講再會。

這咪咪，本旦瘦夾夾仔在公園流浪，來吾屋下三年，佢對驚人到親人，到這下黏人又得人惜，佢又乖又即靈，實在係分人惜入心。若係你也有一隻恁得人惜个貓仔，日日做若鬧鐘仔，該有幾幸福你就知哪！

² 喲：音 heˋ；助詞，表感嘆語氣。

【好得，雨落過咧】彭瑞珠原作

月光，在高高个天頂，分薄薄仔、火灰柑个雲遮等；囡在雲背个月華，懶懶、毋想停動。闊闊、無麼个風浪个海面，一片恬靜，就單淨，遠遠、天邊該¹，兩三點仔漁船个電火，跔等無麼个想徒步个時間瞞啊瞞仔。

海面右側角个烏暗肚，一痕山蟻公恁大仔个鑽石碎，對海天之間順順仔遊等來。「係麼个船仔呢？厥電火，仰恁幼？」「哪係幼，係幾下排電火層等，有錢人个船仔唷！」「毋係漁船，係大船仔呢！」該係貨輪，還係風力發電个工程船呢？都毋像。佢用兩十節²个速度，遊啊遊仔，遊到遠遠个頭前中央，分恁兜看真。

「一、二、三、四……」³「船面，盡少有五排電火……，啊，係載人去寮个郵輪啦！」⁴「佢愛下南還係上北？駛去哪隻國家呢？」煞煞，撈出手機仔，毋使過揣也！

根據阿古哥³个地圖，臺灣盡北个燈塔——富貴角，在左手片

較過去一息仔；正前方，該係……，啊，愛去日本啦！船仔，就照等阿古哥講个「北方」，直直駛、駛到毋見忒，留分恁兜去「回想」。回想，千過儕共船遶寮个快樂，上擺，恁兜也識定過該船頂盡高棧个房間，照這下个時間來看，係愛食宵夜……。

玄玄風，一隻烏影對左手片掬啊過⁴，實在還急性！順等佢掬出來个方向，路燈照等个圍欄角，一個五彩个螞蟻絲圓網，厥邊脣，分該隻蝶仔撞爛一大空。一對晟光、晟光个螞蟻子哀仔，慢板慢板、恬恬在網脣看，顛倒係恁兜代佢道嘆！

唉，看也一暗晡灰暗个海面，好駛車仔轉去睡目咧！行到車脣正發現，青青个草坪軟松軟松⁵，草坪面一哪仔都係靚嫩个細黃花。係啊，雨落過也，薄雲開始散，滿天……都係幼幼个星光；天光日，會係好天時啊！

好得，雨落過咧，螞蟻阿母毋使過涿雨整網，還有柔柔个月光、靚靚个花坪同佢做伴；恁兜也吹著五月涼風、看著海景，餵飽不少蚊仔咧！

¹ 該：音 ge`；那個地方、那裡。

² 節：音 jied`；此指速率單位，定義為每小時海里數。

³ 阿古哥：音 a` gu` go`；阿古哥，此指 Google。

⁴ 掬啊過：音 xio a go；以極快的速度經過。

⁵ 軟松軟松：音 ngion` xim ngion` xim；柔軟彈動的樣子。

編號 5 號

【老樟樹个春天】曾俊鑾原作

老樟樹企在路脣毋知幾多年哩，佢个樹身愛三個大人正做得圍起來，歲月在厥圓身留下永久个影跡。就像舊年熱天做風搓，盡多樹極分風打斷截；底下个泥肉也分水打走，跣跣糾糾¹个樹根分人看現現。該央時，佢分暴風吹到拗腰，強強會橫下去。前一站仔，又堵著最冷个寒天，三日風，三日霜，在本成結疔个地方切開還較深个傷口。

等最尾一擺寒流過詐，火蛇緊曠，暗雷響，老樟樹微微感受著對遠方傳過來沉沉个鼓聲，該係春天在地泥下睡醒个信號。佢先擘嘴擘鼻，續等伸一下腰骨，跔等風个節奏發出「喀喀」个聲音。空氣裡背開始鼻著一種特殊个芬芳，該係南方吹來溫暖个水氣，合等新生命黏時會必芽个味緒。

起先係該兜毋打眼个四點根²同臭頭香³，佢兜有一滴仔畏羞，對老樟樹腳下个地泥肚同頭那探出來，嫩習習个葉仔挽等晶瑩个露水。老樟樹同這兜小生命低言細語，歡喜佢兜來共下迎接久違

个春光。

初春个暗晡總係有一息仔清冷，北風合等兩毛仔毋多知仔就到來哩，兩點仔輕輕仔打等老樟樹个葉仔，演奏一首和諧个夜曲。這雨水滋養燥水个樹根，也洗淨一身个塵灰。過無幾久，北風停，南風起，老樟樹看著燕仔隨風而來，老朋友轉來哩。佢兜在街路个屋簷下無閒泊杈，對河壩脣銜泥整舊年个老竇，流線个身胚在藍藍个天頂劃出優美个弧線。佢兜係春天个使者，帶來對生命个祝福。

老樟樹下肯定定仔鬧熱起來。堵著燒暖个日仔，莊肚个老人家會在樹下行棋仔、打嘴鼓，耕種人會憑等樹身歇暈，放學个細孺仔會在厥四圍搞家啦飯仔同園人尋。老樟樹企到瞪瞪神氣百貫⁴，就像高長大漢个老者，用闊闊个樹影為佢兜抵日頭，用輕輕个故氣為佢兜送涼風。

對眼前个情景，老樟樹當感動，滿心歡喜。佢看往遠，高山崑頂⁵、平洋坑壩，都既經換忒灰色个舊衫，濛濛个濛沙煙下背係新色个大地。一陣風吹啊過來，老樟樹个極袴跔等風搖啊搖，佢毋堵好嘎啄目睡，一轉首，幼嫩个新葉就在手指尖項綻筍。

¹ 跣跣糾糾：音 gio' gio' giu' giu'；彎彎曲曲。

² 四點根：音 xi diam' gin'；酢漿草。

³ 臭頭香：音 cu teu' hiong'；香附子。

⁴ 神氣百貫：音 siin' hi bag' gon；精神勃勃。

⁵ 高山崑頂：音 go' san' gien dang'；高山山脊。

115 年全國語文競賽臺灣客語朗讀文章高中學生組（四縣腔）

編號 6 號

【拈著一隻青鸚仔】范振新原作

舊年 6 月有一日下晝，一陣風馳雨過後，佢去雜貨店个路項，遠遠看著一隻毋知麼个東西在淺淺个水窟仔裡肚蠕蠕動，佢煞煞行前去看真兜仔，原來係青鸚仔个鳥子。

佢心肝肚胚想，敢係頭先分大水打下來个？跔等就聽著佢「啾——啾——啾——」个叫聲，佢頭臥臥尋，看有厥爺哀無，嘎無尋著，又看該樹仔恁高，想愛同佢放上去也無法度。看佢冷到激激顫，驚怕佢會消忒，高不將帶轉屋下去照顧。

該暗晡，佢無睡好，因為差毋多隔兩三點鐘就愛跣床飼鳥子食水。逐擺飼佢食水个時節，就用手指滴一滴水在厥个嘴脣，厥个舌嫵就會凸出來，同水啗落嘴肚。該央時，佢還毋會食飼料，佢愁會畜毋生，好得到第二日，佢就會討食咧。

見擺肚屎枵个時節，厥个頸根會擲到長長，嘴擘大大，還會盡命拈叫「啾啾啾啾啾！」搶等愛食。佢煞煞同飼料畝兜仔水，用細湯匙灌落去，一口、兩口、三口。鳥子逐擺都食毋多，毋過盡遽就枵，故所愛輒輒飼，還又食啊飽就睡目，正經係食飽睡、睡飽食。

拈轉來畜無一隻月，就會飛咧。青鸚仔學飛个時節，會撞來撞去，一下仔撞著壁，一下仔撞著玻璃，就像嬰兒仔學行路共樣，下把仔會跌倒。有一擺佢又撞著地，就嘴擘擘仔像失魂樣仔，恬恬企在鳥籠頂無停動，分佢盡愁慮，檢查過後，好得無仰般。就恁樣跌斷腳骨顛倒勇，緊撞緊飛，緊飛緊撞，慢慢仔，佢就越來越會飛咧，速度還當遽，成時會在桌下串啊過，一矚目就無看著地。該載，佢聽得識自家个名仔，喊一聲就會飛轉吾个手項。飛瘡地就會在巴掌嫵歇睏，同頭那困在翼胛下睡目。

青鸚仔係城市盡輒看著个鳥仔，毋過頭擺毋識去注意。係背尾畜這鳥仔以後正發現，在佢歇个屋脣，斷真有盡多。這下係聽著有青鸚仔个叫聲，佢黏皮就知附近有青鸚仔。佢兜个叫聲盡有變化，逐種叫聲都有佢个意義同目的，佢聽厥个叫聲大體就揣得出佢想愛做麼个，比論講在該尋伴、分大鳥仔嚇著、撩佢發譴个叫聲，抑係當自然、當舒適時節个叫聲，全聽得出。

在屋下，鳥籠門佢毋識關，隨在佢飛。這下逐日都會聽著佢當輕鬆个叫聲，就像精靈在該唱歌樣仔，「啾——」毋會停。

【梨情二三事】郭亭好原作

阿公種有一大片个梨園，春天時蓬白个梨花開到鬧借借仔，等到熱天橫山梨就打到墜極墜枝。頭擺有梨仔「高接」个技術，梨農做下係種橫山梨。橫山梨大瓣粒皮又粗，想愛價數賣來好，包裝進前定著愛先洗過，故所在寮涼該下，長間會看著農家人一屋大細戴等棉紗手落仔、圍等一隻用水筲透水个大腳盆在該洗大梨。

緊工時節，佢兜幾個細孳仔會分阿公調轉去搵手。有一擺，表阿哥無認真洗梨仔淨顧搞水，結果一粒像嬰兒仔頭那恁大粒个梨仔，斯就「啱」聲仔輪¹落地泥下，阿公看著就咄：「這南蛇、這南蛇！正經係生雞卵無、屙雞屎就有。喊佢認真兜仔莫過搞咗，嘎連靚靚个梨仔也同佢輪落地泥下，實在還綻頭哪！」分人刻臭頭个表阿哥，嘴嘟鼻翹毋敢過搞。

阿婆看著毋盼得就講：「好咧、好咧！大家較認真兜仔，下晝帶你兜共下去果菜市場賣梨仔！」哇！聽著做得跔去賣梨仔，大家个精神就來咗。尤其係表阿哥黏時就企跔起來，當遠手个同

米籬肚个大梨仔一粒、一粒緊拈落腳盆肚，包裝个時節也特別認真。看佢兜略略較慢板兜仔，佢就會像班長樣仔緊逐佢兜。因為佢知有好食个大麵同仙草冰在果菜市場等等佢兜。

下晝時个果菜市場鬧熱濟借，買果子个販仔像鷓鴣樣仔，目珠利利在市場肚滿哪巡來巡去，看哪主个梨仔清甜好食；若係分佢看中意个，就用厥尖尖个背，煞猛同你啄價數，剝到這兜農家人血流血汀。毋過阿婆對自家種个梨仔品質當有自信，若係販仔來開个價數爭差忒多，佢定著毋肯放，有中意个販仔就來來去去行幾下輪、搵忒歸點鐘仔，毋過阿婆共樣恁堅持，盡尾該販仔無奈何，就照阿婆開个價數來買貨。

佢兜這幾個細孳仔看著梨仔賣忒咗，歡喜到緊飆，緊逐阿公、阿婆：「遽遽啦、遽遽啦！佢兜肚屎枵到憑背囊咗啦！」大麵一兜啊來，大家就像枵鬼樣仔，毋驚燒、頭沉沉仔大口大口煞猛啖。看佢兜食到汗流脈落，惜佢兜个阿婆，總會過喊幾碗透心涼个仙草冰分佢兜食。

該央時，傍等阿公、阿婆个笑容，同叔伯兄弟共下搶篋个好味緒，這下，哪搭位个知名大麵攤、仙草攤，也尋毋轉咧！

¹ 輪：音 lin；轉動。

【 擘鹽个西瓜 】黃美貞原作

佢一直記得細人仔个熱天，係對一粒西瓜開始个。

該年佢小學三年生，阿姆在菜園箍一細埕地，講愛自家來種幾頭仔西瓜食，做得省一息買果子个錢，又做得少食兜仔零塔。第一擺看該頭細細仔个西瓜秧，葉仔皮毛鬢鬢仔，生當慢，逐日放學第一件事情就係跔在佢脣項，看佢有變較大一息仔無。該年熱天特別熱，日頭晒到地泥會難人。佢攞等細錫桶去淋水，還用舊遮仔同佢抵日頭，細心細意來照顧。

叔婆看著佢日日無閒泊杈，笑等講：「你種西瓜比佢還較認真哦！」種瓜來講，叔婆係老手路也，逐年熱天，佢總會擇兜仔自家種个西瓜來賣。佢用擔竿揸等菜籃，一片放一粒西瓜，伙房人食飽晝在竹頭下坐寮个時節，佢就切到一盞盞仔分大家嘗看啊。該沙沙又甜甜个味緒，大家相賽注文，兩下半就分人應淨淨也。

佢種个西瓜總算在避暑該下開花，結果，該日，氣象報導風搓愛來咧，阿爸細心細意去田項摘下來，先放在屋簷下，佢拗等大西瓜毋肯放，緊講毋盼得破來食。食飽夜，一屋下人坐在禾埕

打嘴鼓，阿姆拿出一支鋒利个長刀仔，輕輕仔破開析，佢就一路必開來。紅濟濟个瓜瓢，還有烏金烏金个瓜仁排到齊齊，紅紅个西瓜水，水洩洩仔¹緊流。

佢等毋掣阿姆切，遽遽挖一埕塞到嘴空。甜係甜，毋過比起叔婆賣个，又試著還差一息仔。阿姆笑等搖頭，對灶下拿出一細碟仔鹽：「來，擘一息鹽試看啊。」雖然試著疑狐還係照等做。無想著，咬一口，西瓜正經變甜也。該年過後，屋下會種幾頭仔西瓜秧。雖然毋係粒粒好，成時生來孬孬、成時分蟲仔咬，擘兜鹽落去，該西瓜就係童年記憶裡肚盡清甜个味道。

這下个西瓜大體對外地運來，外皮亮線、口感共樣，還有搵等合格个紅印仔，毋過佢總係試著少麼个東西，少忒該種自家種瓜時節个期待、日頭下汗流脈落个辛苦。因為正經个甘甜，係囡在平凡裡肚，愛一息仔鹽，正食得出來。

¹ 水洩洩仔：音 sui` iog` iog` e`；水分飽滿的樣子。

【比手機仔較有智慧】李淑娟原作

手機手機，人手一機！現代个學生仔大體都做得講係低頭族，火車頭、捷運站、公車項，無論坐等抑企等，耳機一掛手機一抹，網路世界花里必駁，像毒品樣仔錫人，頭沉沉仔沒到裡背毋想出來。

國中畢業該年，考試个成績還罔罔仔，阿爸送佢一支智慧型个手機，交代講愛利用佢好好學習。看等該時行个色目，還有後背該粒缺角个蘋果、專業个三個鏡頭，佢連等幾日暢到毋使食飯，淨暢都會飽。

高中生活強調自主學習，無人掌等讀書繳作業，想讀幾多內容、愛加強哪個科目都愛靠自家規劃，加上先生無恁嚴條，分線上遊戲錫著个佢一下失算，尋毋著學習个動力、讀書个目標，作業層三砒四無寫、無做、無交。講乜奇怪，較新个流行歌曲聽乜幾遍佢就會唱，再難个遊戲搞過一擺就當熟絡，毋過聽先生講話就像鴨仔聽雷共樣，上課啄目睡、坐等緊打米¹。

看佢每日掌手機，一離開手機就拗拗暴暴緊發譴，輒常半夜

¹ 緊打米：音 gin` da` mi`；形容人打瞌睡一直點頭的樣子像前人打米的動作。

轉點還毋睡目，偷偷摺摺搯等被骨搞到臨天光，阿姆心焦馬亂唸講：「再搞下去，目珠會瞎忒哦！」毋知分醒个佢總係左片耳公入，右片耳公出，合想著奸計——詐屙屎園入便所搞，確確係老古人講个：「懶人無屙無好奈！」一暗晡愛屙兩三到，一到愛屙論²點鐘，無屙到阿姆來碰³門絕對毋出來。

一直愛到考試个前一禮拜正會開始愁慮，坐在書桌前掀開新衝衝仔⁴个課本，嘎毋知愛對哪開始讀，牙研目皺拿等原子筆，頭那痛到硬硬會噉忒。過無兩日个好光景，想拚个決心像風恁輕，讀書个計畫比紙較薄，數學哪有遊戲恁生趣，英文廣播哪有音樂恁好聽，懊躁个佢又開始抹手機仔尋快樂乜。用腳膝頭想乜知，學期結束个時節，幾下科目無及格，化學連補考个機會都無，唉！實在見笑。

阿婆講過：「橫一擺，總毋好再橫第二擺。」這下佢正知，人愛比手機仔較有智慧，同佢用做搯手學習用个承勞，毋係托到變爛死時間个主人。好好管理時間，規劃學習个節奏，尋出自家个方向，認真讀書人生正毋會輸。

² 論：音 nun；推知。

³ 碰：音 pong`；以拳、肘或身體用力敲。

⁴ 新衝衝仔：音 xin` cung cung e`；嶄新的樣子。

【行出去，正有風景】范振新原作

在臺灣，有人講人生在世有三件事情定著愛做：蹶玉山，泳渡日月潭，還過騎自行車環島。雖然講，這兜全無恁該，愛堅耐還愛有體力正奈得何。也有人講，該恁瘠个事情，何麼死苦，食飽袒閒喲¹？毋過，還係有緊來緊多人相賽²去自我挑戰。阿宏也共樣，將這三件事，準做佢人生个目標。

從細，阿宏厥爸總會講：「做人做事愛有膽，毋識做過个就愛去試，無試仰會知！」厥爸會恁樣講，就係希望阿宏愛培養勇敢面對艱難个自信，就像人講：「敢去就一擔樵，毋敢去就屋下愁。」故所，厥爸當鼓勵佢趕後生身體較砸个時節，去挑戰人生。受著厥爸个影響，阿宏 18 歲生日該日，就騎等自行車，單人獨馬走去環島。

出發該日一色青天，阿宏打早就一身運動衫褲，騎等屋下該臺既經換臺灣兩圈个腳踏車準備出發。無毋著，這臺自行車雖然毋係當高級，毋過異耐戰，佢兩個阿哥都係騎這臺鐵馬去環島，恁多年來毋識壞。出發前，就單淨加安隻車架放包袱仔，再過同

輪仔嘮風就出門。無特別安排路線，也無按算一日愛騎幾遠，就跔自家个心情來行。

這擺環島無先抽間規劃，正經係「時到時當，無米煮番薯湯」。有幾日斷烏咧還言決定愛在哪歇，臨時臨及正上網尋。壞蹄哩！該日騎到臺東，的對堵著奈日，又無先注文，問幾下間旅社嘎全無間房，高不將走去海脣个沙灘睡。雖然沙灘無眠床恁自然，毋過，脣頭無別儕，恬靜恬靜，淨聽得著海浪个聲一陣一陣，四圍暗摸叮咚，天頂个星仔一瞞一瞞。這暗晡，阿宏就在這滿天星光个美景之中睡忒也。

第二日天矇光，阿宏坐在沙灘，遠遠看著該火紅色个大卵黃對海竇肚鑽啊出來，緊來緊大、緊來緊光。看著這天闊地闊个光景，阿宏在心肝肚想：有兜路，無行過，你毋知風景在哪；有兜事情，無親身去做，你永久毋知自家做得行幾遠。

¹ 袒閒喲：音 tiong` han` he`；太閒嗎。表示反詰與確認。

² 相賽：音 xiong` coi；爭相、相互、相繼。